




恪靖奏稿續編卷五十八目錄

遵

旨督辦新疆軍務敬陳籌畫情形摺

請

簡派大員幫辦陝甘軍務摺

請催山東等省應解塔城專餉片

胡國龍等應繳台費暫予展緩片

軍機大臣 字寄光緒元年六月初九日奉

上諭景廉等奏會商軍務見在需糧萬緊并陳糧運情形各摺片烏魯木齊逆匪日久負隅賊黨分踞古牧地等處南路吐魯番則有安集延盤踞大兵進剿勢必互相救援或由南路絕徑窺我後路以圖牽掣應如何分路進兵使該逆首尾不能顧著左宗棠金順會商機宜妥籌調度刻下古濟等處糧石業已搜買淨盡沙山等處將定西營馬隊撤回就食該處見駐各營口糧仍缺亦應設法接濟金順所部後隊未能調齊前進見經

景廉等多方籌畫尙難接至新糧延至冬令長途積雪
加以天山之阻則挽糧更難爲計著左宗棠督飭承辦
各員將關內糧石迅速轉運務於本年秋間運解數萬
石到古城以裕軍食該處需糧情形甚爲迫切倘饋餉
稍有不繼貽誤戎機或竟因飢譁潰左宗棠豈能當此
重咎耶烏科兩城糧運無從籌辦巴里坤迤北大巴地
方收糧亦屬無多歸化包頭採買米麪事屬可行惟運
費較鉅左宗棠已派員攜銀二萬兩前往試辦并著籌
款增採總之關外軍糧無論由何處採辦左宗棠責無

旁貸務當悉心經理俾資飽騰毋得意存膜視署巴里
坤領隊大臣慶壽見在降調沙克都林扎布能否赴任
著金順查明具奏將此由六百里各諭令知之欽此

遵

旨督辦新疆軍務敬陳籌畫情形摺

奏爲遵

旨督辦新疆軍務敬陳籌畫情形恭摺仰祈

聖鑒事竊

臣

於四月初八日承准軍機大臣字寄光緒

元年三月二十八日奉

上諭本日已有旨令左宗棠以欽差大臣督辦新疆軍務金順調補烏魯木齊都統仍幫辦軍務景廉調補正白旗漢軍都統回京供職景廉著俟金順行抵古城後將各營兵勇糧餉移交金順接管再行起程回京新疆

軍務孔殷必須速籌進兵節節掃蕩金順本有自帶各營益以景廉所部兵力已不單薄著卽督率各營親臨前敵相機進剿爲收復烏魯木齊之計所有進兵機宜隨時會商左宗棠酌辦袁保恒已令回京供職西征糧台已諭左宗棠責成陝西藩司經理應行奏催及咨行各省事件呈由陝西巡撫覈辦關外轉運事宜卽在哈密巴里坤各處設立糧餉分局由左宗棠派員經管袁保恒將經手事件逐一交代清楚後起程回京見在關外兵事餉事并轉運事宜均歸左宗棠督辦蘭州相距

寫遠鞭長莫及該大臣當統籌全局酌核辦理關外軍
食務當源源運濟以期士飽馬騰毋令停軍待哺宋慶
一軍該大臣已咨令回紇僮關本日亦諭知錢鼎銘商
令該提督擇要駐紮矣等因欽此跪聆之下悚惕實深
竊維新疆之事從前因兵力餉事未能兼顧遂至叛回
構變強敵窺邊土宇人民不可覆按於此而欲力圖恢
復挈二萬里戎索之舊還之職方戢萬千族殊俗之民
漸以聲教正值寰區甫靖財力久殫內患雖平民勞未
艾其難誠有倍於拓疆之始者微臣庸朽菲才又值衰

疾侵尋志慮鈍竭何敢不自忖量謬以自承顧念臣子
之義厥重匪躬疆場攸司責無他諉自從戎伊始卽矢
盡瘁馳驅豈頭白臨邊忽易初志謹將所籌情形爲我
皇上敬陳之一曰廣籌軍糧也師行北路宜用北路之
糧不但節費亦免耗糧臣前疏已詳之南路肅局既有
見糧又車馱駝隻購雇稍多可以灌運自宜嚴切督催
以廣儲峙北局設於歸化分局設於包頭飭升用知府
前署綏德直隸州知州陳瑞芝提督銜總兵蕭兆元司
之雇民駝轉運計自三月至五月據報陸續運過四十

餘萬斤至巴里坤每百斤牽合銀八兩內外袁保恒前

奏甯夏採運

臣

飭署甯夏鎮總兵記名提督譚拔萃甯

夏府知府李宗賓接辦見據報已雇駝數百先由察罕

廟試行如果此路通利再爲加辦察看漠北素產健駝

又便水草惜久未開運倉卒應募者少又駝戶每以拉

差爲苦疑沮不前

臣

見飭巴里坤鎮鎮迪道嚴行示禁

冀聞風踵至運道暢行庶餉饋可通亦收節省之益正

辦理間適俄國游歷官索思諾福斯齊等到蘭與之談

論近事索思諾福斯齊自稱俄國在山諾爾地方糧產

甚多駝隻亦健距中國古城地方不遠如中國需用糧食伊可代辦送至古城交收由俄起運須護運兵弁均由在山諾爾派撥其兵費一併攤入糧腳價內每百斤需銀七兩五錢如年豐糧多駝腳不貴則價尙可減也比卽與定議書立合約計年內可運古城糧二百萬斤明年夏可運足三百萬斤索思諾福斯齊已專兵八瓦勞伏前往告知其地巡撫據稱斷不致悞臣見委知府銜甘肅候補同知丁鶚等赴巴里坤又委布政使銜甘肅卽補道陶兆熊等赴古城辦理糧開墾及收支事

宜此北路籌糧情形也南路肅局存見糧三萬餘石安
西局存見糧一百數十萬斤哈密局除張曜各營外存
見糧一百三十萬斤見正趕緊灌運張曜在哈密辦屯
墾水利事必躬親不惜勞瘁據報墾荒地一萬九千餘
畝可獲糧數千石見據甘涼肅各廳州縣稟報今歲夏
雨優渥冀獲豐稔將來新疆市價有減無增車駝之受
雇者亦日多一日轉運較從前稍易此南路籌糧情形
也臣因歸化包頭採運巴里坤較涼甘肅採運巴里坤
價脚大減而糧則實裝實卸別無虛耗故決計於北路

開一運道陸續撥兌實銀已四十餘萬兩甯夏已發銀三萬兩計秋高駝集運數可增南路由甘運肅由肅運安西均用車馱由安西運哈密運巴里坤均用駝隻節設廠局溶水泉刈草薪以利運道一切經費統於現辦採運項下開支計轆轤轉般運數可倍此合南北兩運籌巴里坤之糧也俄國在山諾爾地方緊接我布倫托海邊界距古城數百里俄人代爲採運二百萬斤送古城視巴里坤運古城路程較近實屬獲之意外計需銀十五萬兩此於北路之北籌古城之糧也就目前局勢

籌應前敵急需事之所得爲者祇此厯代之論邊防莫
不以開屯爲首務或辦之用兵之時以省轉饋或辦之
事定之後以規久遠要之得人則有益軍儲不得其人
則虛糜經費且西北治地開荒尤資水利就窪潴水障
之令深引渠溉田灑之令普旣需人工尤資器具而哈
密土質善滲土工石工外別有毛毡包裹之工爲他處
所罕旣須多籌器具又需廣備毡條開墾之先所費卽
巨臣於張曜由安進屯哈密時已津貼過運腳等銀五
萬餘兩購辦毡條價腳銀約九萬一千餘兩張曜躬率

所部殫力經營而後得著成效計以後踵而行之因此
奧區保綏戎藩而成數十百年無窮之利見復經畫巴
里坤收召飢兵一千三百餘名每月給餉銀三千兩配
以矛桿鎗礮子藥俾其復成勁旅復委甘肅同知丁鶚
等勸辦屯墾事務兼收包歸甯夏所解軍糧惟巴里坤
地當天山頂畔氣候凝寒舊設天時地利人和等廠久
已荒廢屯務雖興暫尙難供客軍坐食也由巴城而西
北七站地勢沃衍天氣漸和由此而古城迤西一帶更
稱膏腴上壤景廉所辦公屯私屯外餘荒甚多若兵民

盡力耕墾不虞乏食

臣

見委布政使銜甘肅補用道陶

兆熊揀帶員弁前赴古城驗收俄人代辦軍糧支發價
腳一面察看古城一帶情形經畫屯墾事宜隨時馳稟
核奪此籌哈密巴里坤古城糧運屯墾情形也一曰兵
事宜早爲整理也西事稽延至今未睹成效由於冗食
多而戰士少耳旗綠諸營久不足額就近各省無勁兵
應調於是取土著兵民及各處就食兵民授地耕墾一
備軍食一備戰守無事則驅其盡力隴畝有事則調其
效命鋒鏑謂之且耕且戰事非不勞謂之卽兵卽農名